

SOALAN NO: 35

- Pengiklanan pesanan di lokasi-lokasi strategik, stesen-stesen minyak, dan sebagainya; dan
- Program jangkauan di bawah inisiatif 'Klik Dengan Bijak', di Pusat Internet 1Malaysia seluruh negara.

Program advokasi ini bertujuan mendidik masyarakat agar lebih "celik fakta", mahir menganalisis berita dan sentiasa berwaspada sebelum bertindak menyebarkan berita yang tidak ditentu sahkan. Usaha berterusan ini digerakkan dengan penganjuran 24 siri jelajah kempen Sebenarnya.my yang dirancang di seluruh negara bertujuan untuk mendekati masyarakat dalam memberi pemahaman terhadap bahaya penularan berita palsu selain memberi penjelasan mengenai fungsi portal Sebenarnya.my.

Matlamat utama Kerajaan adalah untuk melahirkan masyarakat yang lebih peka dan membudayakan amalan menyemak dan menganalisis berita yang diterima. Analisis yang dijalankan melalui portal Sebenarnya.my mendapati terdapat peningkatan purata 10% setiap suku tahun (*quarterly*) terhadap jumlah layaran portal. Peningkatan ini memberi indikasi positif peningkatan kadar kesedaran dalam kalangan masyarakat ke arah membudayakan amalan menyemak, menganalisis dan menentu sahkan berita yang diterima khususnya melalui saluran-saluran yang kredibel.

SOALAN NO: 36

**PEMBERITAHUAN PERTANYAAN DEWAN RAKYAT
JAWAPAN OLEH YB DATUK SERI DR. S. SUBRAMANIAM
MENTERI KESIHATAN MALAYSIA**

PERTANYAAN : LISAN
DARIPADA : TUAN AHMAD MARZUK BIN SHAARY
[BACHOK]
TARIKH : 03 APRIL 2018
SOALAN : 36

Tuan Ahmad Marzuk Bin Shaary [Bachok] minta **MENTERI KESIHATAN** menyatakan status kemajuan pembinaan Hospital Bachok. Apakah ada kelemahan-kelemahan yang dikenal pasti.

Tuan Yang di-Pertua,

Pelaksanaan Hospital Bachok berjalan mengikut perancangan seperti yang dijadualkan oleh Kementerian Kesihatan Malaysia (KKM) dan Jabatan Kerja Raya sebagai Agensi Pelaksana. Berdasarkan kepada status semasa pelaksanaan projek, kemajuan kerja Kontraktor sehingga 14 Februari 2018 adalah 25 peratus sebenar berbanding jadual 19 peratus. Pada masa sekarang, pihak Kontraktor sedang giat untuk menyiapkan kerja-kerja struktur bangunan utama hospital terlebih dahulu sebelum kerja-kerja seterusnya dapat dilaksanakan.

Melihat kepada peratus kemajuan kerja yang ditunjukkan sehingga kini, projek Hospital Bachok ini secara umumnya berjalan dengan lancar dan mengikut perancangan yang telah dilaksanakan tanpa mengalami masalah yang bakal memberi kesan kepada penyiapan projek. KKM bersama-sama dengan Jabatan Kerja Raya komited untuk memastikan Hospital Bachok ini dapat disiapkan mengikut tempoh yang telah ditetapkan iaitu pada 23 September 2019.